

Sujet:

„bläggbörds“

Ych weiss nid, wär duet „bläggbörds“ kenne...
Z Basel duet me sy „Amsle“ nenne!
Die Ainte hogge uffeme Baum,
die Andere am Trottoir – als e Draum...
Doch ally dien sys fertyg griege,
friehter oder schpeeter z **fliege**!

Die ainte **fliege** mit grossem „Hellau“,
die Andre **fliege** mit Hello grad au.
Kasch schtänggere oder futtere,
schlussändlig kha sch nur Suttere!
Doch nid nur d „Hello“ isch am Boode!
Au Lyt in Noodelfilz und Loode
mien irgendwann, so noodynoo,
per **Fluugfescht** wyt in d Fremdy goo!

Nimm emoll dr **Vogel** Haiko:
Dä het in Basel welle hai kho,
bis dass dr FCB (zwar mit Loobe)
gmaint het: „Dy Haimet isch by de Schwoobe!“
...und so wird au dr **Vogel** offebar
nyt anders als „Amsel, Fink und Star“!
Do khas dr Muri besser aanegriega!
- Will e Yak (in) kha **nid fliege**!

Gflooge isch jo naimeduure
au dr Muurer! – und zwar uff d Schnuure!
Will syny Gripen – au wenn är schimpft –
wärde durs Bundes-Impf-Gsetz gimpft!
Do isch s em Baschy besser gloffe!
Dä het e baar dürry Bierli gsoffe
und scho isch är – das isch nid glooge –
dangg e paar Promille in d Regieryg **gflooge**!
Dr Morin maint schyyns doo drbyy:
„Egaal! Ych schtand fir „green-birds“ yy!“
Dr Schugger-Chef Lipps, dä gmainy Schuft
maint: „Dürr? Dä **fliegt** mit warmer Luft!“

Aus schwyzer Radio und s Telewischen
isch **bläggbörds**-mässyg am „duuren-zischen“!
Me looht trotz allne Yyschaltquoote
s Benissimo zum **Fluugfescht** groote
und hofft, dass men als „SRF“ meh erraich’!
Hoffe darfsch! Aber s isch e Saich!

Aus Baugwärb z Basel isch ohny z Frooge
zimmlig bees uff e **Schnaabel gflooge**!
Will wär schafft scho by dr Mäss gärn mit
vollem Biss
fir e Lohn vomene **Amsle-Schiss**?

Dr eschtryychysch Baumgartner het e Knall
und **fliegt** freiwillyg sogar mit Yberschall!
Am Boden unde maint är verbisse:
„Ych glaub ych ha in d Hose gsch...!“
Drzue maint e Griech per Euro-Twitter:
„Uns goht s au ohny **Fliege** schitter!“
Und d Häftling im Wooghof – die arme Sieche
fliege nid! Sy mien in d Freihait krieche!

Das isch anderscht by de Lyt vo dr Gaba!
die **fliege** trotz Zahnpaschta-Geschaba!
Oder d Lyt vo dr Von Roll, wo s wurde
begriesse,
schtatt **fliege** lieber wytter z giesse!
Nimm ally Lyt vo andre Schtelle,
wo nit uff d Schtrooss hän gschellt wärde
welle!
Alles „bläggbörds“, wo s mien fertyg griega,
mitme blaue Brief go leehre z **fliege**!

„bläggbörds“, aarbetsloos und gschasst?!
eb das zu unsrer Fasnacht passt?

Liebe Bebbi gsehs doch yy:
Fir sottygy Mensche muesses Fasnacht s yy!
Und ehrlich gsait – das muesch nit mol teschte:
Mit uns Wurze fliegsch am beschte!

